

## Der dritt taylor.

So merck auch das man alle Krapffen mit zucker mag besetzen / so man den erbern leutten fürtreget. So ist selten ein Krapff / so man ein wenig welscher weinber darein hacket / on Peterlein vnd on kraut sie werden dester besser. Also hast du den teyg vnd Krapffen füllen / ob du die maß recht kanst treffen / so bist du ein gutter Koch.

### ¶ Das. xx. Capitel.

¶ Ein guts gebachens von ayern mach also. Zerschlag jr wie vil du wilt / Klopff sie wol / nym weysß semelbrot / vnd schneyd das würflet darunter / vnd versaltz nit / mach grosse oder kleine bletter mit einem welgerholz nit zu dünn / vnd bach es das ist auch ein gutter Krapffen teyg / wer sein bedarff.

### ¶ Das. xxi. Capitel.

¶ Item ein anders gebachens / Nim Peterlein / beymenten / vñ ander wol geschmackte kreuter / recht als man salsen macht / weysß brosem brodtes darzu / oder geriben leckuchen / das stoß wol durch einander / treyß es durch ein tuch mit guttem wein / damit temperier ayer vnd mel / vñ mach einen starcken teyg / den man mit einem löffel einziech in das schmaltz / aber kleine kühlein als die baumnuß vnd bach sie.

### ¶ Das. xxii. Capitel.

¶ Item ein ander weysß heysse lappenkühlein on Peterlein vnd wein vor gesagt. Mach ein starcken teyg mit ayern / vnd nym das dritteyl milch / zeuch in auff ein bret / vnd zeuch in mit einem welgerholz auß weissem melß nit zu dünn oder zu dick in die leng vñ schmal sey / mach lappen darauß an orten schön gezindelt / oder vorn als die aychenbletter / was form du wilt / wilt du sie braun / so laß wol bachen / oder gelb so mach den teyg mit saffran / zertriben in wein oder milch / grün von Peterlein safft / oder was grün ferbt / Blaw von Komplumen / die lepischen kühlein seind gut auß allen salsen zu essen für ein gebratens.

### ¶ Das. xxiii. Capitel.

¶ Auch auß dem selben teyg mag man kleine fledlein machen / auffgewollen mit einem brot / darein mach ein füil als gefült ayer / vñ gefült kreß / darüber gesturzet ein ander fledlein mit einem geschlagen rohen ay / schön verhefft vnd bestrichen vmb vnd vmb an den orten /